



ԻՐԱՆԱ-ՀՆԴԿԱՍՏԱՆԻ ՀԱՅՈՑ ԹԵՄԻ ՀԻՄՆԱԴՐՈՒՄԸ (Պատմական ակնարկ)

Գաղթականությունը ահավոր մի չարիք է ժողովուրդների կյանքում: Առավել ևս այն աղետաբեր ու ճակատագրական է եղել մեր «փոքրիկ ածու»-ի համար: Մայր երկրից հայ ժողովրդի մեծ բեկորները հողմացրիվ լինելով, անցյալում, ամայացրել են մեր Աշխարհը: Գաղթական հայերից շատերը ժամանակի ահարկու ձուլման մամիչի ծանրությանը չդիմանալով՝ ձուլվել ու անհետացել են: Պատմական անցյալում մեր ժողովրդի արտագաղթը սեփական հայրենիքից ունեցել է տարբեր պատճառներ՝ քաղաքական իշխանության կորուստ, բռնի գերեվարություն, օտար տիրապետողների խաբուսիկ հրավելուներ, հայրենի երկրում կյանքի և ունեցվածքի անապահովություն և այլ դրդապատճառներ: Հայաստանից արտագաղթը դեպի Պարսկաստան սկսվել է դեռևս Դ և Ե դարերից: Այն վտանգավոր չափերի է հասել թուրք-թաթարական (ԺԱ—ԺԳ դդ.) և մոնղոլական արշավանքների ժամանակ (ԺԳ դ.), երբ Արևելյան Հայաստանը ամբողջությամբ ընկավ նրանց տիրապետության տակ: Հայաստանում ըստեղծված անտանելի պայմանների պատճառով ԺԳ—ԺԴ դարերում արտագաղթողների մեծ մասը հաստատվեց նաև Կիլիկիայում, Կիպրոսում, Հռոդոս և Կրետե կղզիներում: Միջին դարերում, հայ ժողովրդի արտագաղթը Մայր Հայրենիքից այնպիսի մեծ չափերի էր հասել, որ նախադրյալներ ստեղծվեցին

1080 թվականին, հեռավոր Կիլիկիայում, Տավրոսյան անառիկ լեռներում հիմնելու Ռուբինյան հայկական թագավորական իշխանությունը:

ԺԷ դարը նոր ցավեր ու հոգսեր բերեց արյունաքամ հայ ժողովրդին և Մայր Աթոռ Ս. Էջմիածնին: Օսմանյան Թուրքիան և շահական Պարսկաստանը քիչ ընդհատումներով այդ շրջանում պատերազմի մեջ էին միմյանց դեմ մոտավորապես 125 տարի (ԺՁ դարի սկզբներից մինչև ԺԷ դարի երեսնական թվականները)¹, որի ընթացքում մեծ մասամբ Հայաստանն էր պատերազմական այն թատերաբեմը, որտեղ կատարվում էին մարտական գործողությունները: 1604 թվականին, Սեֆյան հարստության նշանավոր բռնակալ Ըսահ-Աբաս արքան (1587—1629 թթ.), երբ գտնվում էր Արարատյան երկրում, խուսափելով օսմանյան բանակի հետ ընդհարվելուց, հրամայում է ամայացնել, անմարդաբնակ դարձնել Հայաստանի բոլոր այն բնակավայրերը, որտեղից պիտի անցներ օսմանյան բանակը: Անգույթ բռնավորի հրամանով Հայաստանի պանապան գավառներից՝ Լոռիից, Ապարանից, Շիրակից, Մակուից, Սալմաստից, Աղբակից և երկրի մյուս գավառներից ողջ ազգաբնակչությունը բռնի, պենքի

¹ Հայ ժողովրդի պատմություն, հատ. 4, Երևան, 1972, էջ 81:

ուժով, հավաքվում է Արարատյան դաշտավայրը, որի ամբողջ բնակչությունը նույնպես ենթակա էր տեղահանման: Հայ ժողովուրդը իր անցած հազարամյա պատմական ճանապարհին սարսափելի վիճակների շատ էր հանդիպել, բայց այն, ինչ կատարվեց 1604 թվականին, նախադեպը չունեցող գազանալին մի ծրագիր էր, որը սպառնում էր հնամենի մեր ժողովրդի ֆիզիկական բնաջնջմանը: «Եւ պայս ամենայն լսելով և գրելով մեր,— ասում է պատմիչը,— ճմլին սիրտք մեր, և գալարին աղիք որովայնի մերոյ, և աչք մեր վտակս արտասուաց թորեալ իշուցանեն, վասն եկելոյ հասելոյ թշուառութեանս ժողովրդեանս մերոյ: Եւ ոչ բաւեմք աստանոր՝ թէ որո՞վ օրինակաւ՝ և կամ որո՞վ տարապու ողբս առեալ աշխարհեսցուք ի վերայ բեկման ազգին և աշխարհին մերոյ... քանզի անմարդաբնակ արար միահաղոյն վամենալի և պուռթի աշխարհս Հայոց»²:

Մեծ խորենացու հայրենասիրական պաթոսով ու ողբով Դավրիժեցի վարդապետը նկարագրում է սրտաճմլիկ մի տեսարան՝ կապված գաղթականության դատապարտված հայ ժողովրդի հետ: Պարսկաստան մեկնելուց առաջ, հայրենիքում վերջին անգամ մեր ժողովրդի պավակները աղոթում են, ապա իրենց սրբազան եկեղեցիների և բնակարանների բանալիները մայր Արաքսի ջրերին պահ տալով, ձեռքները երկինք պարզած, լախառաջ բացականչում են. «Ո՛վ Սուրբ Աստուածածին, այտքիկ բանալիք սրբոյ եկեղեցւոյ մերոյ՝ և տանց մերոց քեզ յանձն լիցի. և դու դարձուացես վմեզ ի տեղիս մեր յօտար երկրէն ուր տանին: Եւ պայս սասցեալ արկին պաւնալիսն ի գետն, և մորմոքալով յոլով ժամս ձայն բարձեալ լացին. և ապա գնացին»³: 1604 թվականին, այսպես դաժանորեն, ծանր պայմաններում հայությունը բռնի բաժանվում էր իր սրբազան հայրենիքից՝ տանելով իր հետ անմոռաց հիշատակներ, բազմաչարչար ու բզկտված Հայրենիքի վեստին տեսնելու անկոտրում հույսով: Հայ ժողովրդի ազգային պարիտրելի այդ ողբերգությունը մեկ ուրիշ ժամանակակից, Ս. Ստեփանոս Նախավկայի վանքի վանահայր Ստեփանոս վարդապետը քնարական մի բանաստեղծությամբ այսպես է ներկայացրել.

Ափսոս քեզ Հայոց խղճիկ ժողովուրդ,
Տիր ու ցան եղած անմեղ, անխորհուրդ,
Գերի գնման աք դեպի խորասան,
Քաղցած ու ծարավ, տկոյր, թշվառական:

² Առաքել վրդ. Դավրիժեցի, Պատմութ. Առաքել վրդ. Դավրիժեցւոյ, Վաղ-պատ, 1896, էջ 52:

³ Առաքել վրդ. Դավրիժեցի, Պատմութ. Առաքել վրդ. Դավրիժեցւոյ, Վաղ-պատ, 1896, էջ 60:

Խարյուր ու խալար ցալի դիմացաք,
Չեր քաղցրիկ երկրեն ոտ դուրս չդրաք,
Խխի ձեր խոր մոր գերեզման թողաք
Տներն ու ժամը ուրիշի տվաք:

Էս սիրուն դաշտերն, մեծ քաղաքներն,
Քաղցրիկ ջրերն, ձեր շեն գեղերն
Ո՛ր աք թողման դուք, որ գնման եք,
Էսպես կլինի՞ որ մոռանում աք:

Վախենում ամ էնպես մտքներացո ընկնի
Ինչքան որ ողջ աք մտքերնուդ չընկնի...
Բարի ձեր որդվոց թոռանց պատմեցէք,
Էսպես խայրենիքն քանդած թողեցիք:

Մասիսի անունն, Հայոց տապանի,
Արարատ դաշտի, Սուրբ Էջմիածնի,
Մեր խոր Վիրապի, Սուրբ Գեղարդ, Մուղնի,
Չմոռնաք մինչև օրն դատաստանի:

Աչքս կուրանար, շլինքս կոտրվեր,
Խեղճ Հայաստան, քեզ էսպես չտեսներ
Թե մեռած էի, ինձ երանի էր,
Քան թե կենդանի աչքս բաց տեսներ՝:

Եվ այսպես, դարավոր մեր թշնամիները հայրենիքից, Մայր Աթոռ Ս. Էջմիածնից հաճախ բռնի պոկել, տեղահանել են նրա վակներիին, հողմացրիվ շարտել օտար ափեր՝ թողնելով նրանց անթիվ ու անհամար վրդկանքների, թշվառության և բացարձակ անորոշության մեջ: Չրկված լինելով իր բուն արմատներից՝ գաղթականության դատապարտված հայ ժողովուրդը ապրելու և հարատևելու իր կենսունակությունը և ավիշը ստացել է հայրենիքի և Ս. Էջմիածնի հետ մշտապես իր ունեցած կենդանի հոգևոր կապի միջոցով: Փաստորեն, այսպես կազմակերպվեցին Մայր Հայրենիքից դուրս գտնվող այսօրվա բոլոր մեր գաղթօջախներն ու հոգևոր առաջնորդությունները: Ամենայն Հայոց Հայրապետներն անցյալում, հաշվի առնելով մեր ժողովրդին հայրենիքից բռնի արտաքսելու տխուր փաստերը, շատ հաճախ ստիպված են եղել արտասուքով ու դողացող ձեռքով հաստատել հայրենիքից ու Մայր Աթոռից աշխարհագրականորեն հեռու գտնվող մի նոր գաղթօջախի կամ հոգևոր թեմի ստեղծումը:

Պատմական այսպիսի դժբախտ և ողբերգական պարագաների ծնունդ հանդիսացավ նաև Իրանա-Հնդկաստանի հայոց թեմի ստեղծումը: Իրանա-Հնդկաստանի հոգևոր թեմը մեր այն գաղթօջախներից է, որը ամենամոտն է հայրենիքին և Մայր Աթոռին:

⁴ Լեո, Երկերի ժողովածու, հատ. 2, Երևան, 1969, էջ 247:

Պարսկաստանում հայկական փոքրիկ գաղթօջախներ սկսել էին կազմակերպվել դեռևս Դ և Ե դարերից: Ավելի ուշ, ԺԱ դարում, սելջուկ-թուրքերի վայրագություններից խուսափելու համար, մեծ թվով հայեր գաղթում են Պարսկաստան, որոնք հիմնականում հաստատվում են Ատրպատականում և Սպահանի շրջաններում: ԺԴ դարում արդեն բազմահոծ հայություն կար Թավրիզում, Ռեշտում, Մարաղայում և Պարսկաստանի մի շարք այլ քաղաքներում: Դժբախտաբար գրավոր աղբյուրներում ոչ մի հիշատակություն չկա մինչև ԺԷ դարը Պարսկաստանում հաստատված հայության եկեղեցական կյանքի մասին: Հետևաբար ճիշտ կլինի ասել, որ Իրանա-Հնդկաստանի հայոց թեմը հիմնականում կազմակերպվել է ԺԷ դարում Շահ-Աբասի կողմից Հայաստանից բռնի Պարսկաստան գաղթեցված շուրջ երեք հարյուր հազար հայերից:

1604 թ. Մայր Աթոռ Ս. Էջմիածնից, գաղթականության հետ, կամավոր Պարսկաստան աքսորի գնաց նաև Ամենայն Հայոց Դավիթ Դ Վաղարշապատեցի կաթողիկոսը (1590—1629): «Ի ժամանակին յորում շահն Կմեծ սուրգունն արար և Կապուս հայոց վարեալ տարաւ յԱսպահան, գնաց ընդ նոսին և Դավիթ կաթողիկոսն»⁵: Հայոց դժբախտ Հայրապետին այդ օրերին ուղեկցում էր Մայր Աթոռի միաբաններից ոմն Մովսես Եպիսկոպոս: Հետագայում կաթողիկոսի կողմից հենց այս Մովսես Եպիսկոպոսն էլ նշանակվեց Իրանա-Հնդկաստանի հայոց առաջին հոգևոր առաջնորդ, որը «Յետ փոքու միջոցի բարութ կառավարութեան հայրենակորոյս հօտին կնքէ զընթացս մահկանացու կենաց իւրոց, ընդ ցաւօք տարեգրութեան սրտի»⁶:

Դժբախտաբար պանդխտության քշված հայ կանգվածները Պարսկաստանի խորքերում տարբեր ձևակառուցների արժանացան: Գիլանի և Մազանդարայի ճահճուտ շրջանները տարված հայությունը, չդիմանալով բնակլիմայական անտանելի պայմաններին, կարճ ժամանակամիջոցում հիմնականում բնաջընջվեց: Բազմաթիվ հայ ընտանիքներ էլ բռնի մահմեդականացվեցին: Շուրջ 10 հազար գերեվարված հայ երիտասարդ տղաներ և աղջիկներ տրվեցին պարսիկ մեծամեծների մոտ ծառայության⁷:

Հոդմացրիվ հայության բեկորները Պարսկաստանում սկզբնական շրջանում գտնվում էին հուսահատ և ծայրահեղ աղքատության վիճակում:

Համատարած դժբախտության այդ օրերին ջուղայահայերն էին, որ նյութական իրենց առատ միջոցներով նպաստեցին և օգնեցին պարսկահայությանը, որը արագ կերպով կարողացավ կազմակերպել իր կյանքը որպես կրոնական ու ազգային համայնք: Հայությունը Պարսկաստանում, իր աշխատասիրության ու ձեռներեցության շնորհիվ, բավական ջուտ վերականգնեց նաև իր տնտեսական վիճակը: Իրանա-Հնդկաստանի թեմը, առաջնորդանիստ Նոր-Ջուղա քաղաքով, նմանվում էր մի փոքրիկ հասարակապետության, որը կառավարվում էր հայրենիքից իր բերած ազգային ու կրոնական ավանդություններով: Որպես կրոնական համայնք, Իրանա-Հնդկաստանի թեմի հայ ժողովուրդը «Ի սկզբան անդ համարեալ լինէին տերունի ժողովուրդի և հնազանդէին Սրբոյ Էջմիածնի»⁸:

Գաղթականությունը հապիվ էր հաստատվել իր նոր բնակավայրում, երբ առաջին հերթին Նոր-Ջուղայում կառուցվում է ժամանակավոր մի եկեղեցի: Հիսուն տարի հետո, 1655 թվականին, թեմակալ առաջնորդ Դավիթ Եպիսկոպոսի (1652—1685) ջանքերով կառուցվում է առաջնորդանիստ Ամենափրկչյան վանքը: Այդ մասին է վկայում տաճարի արևմտյան դռան վրայի արձանագրությունը. «Հիմնարկեցաւ Ամենափրկչի վանքս ի թիվն ՌձԴ (1655), ի թագաւորութեան երկրորդ Շահ-Աբասին և կաթողիկոսութեան Տեառն Փիլիպպոսի ի ձեռն սուրբ ուխտի Առաջնորդի Դավթի վարդապետի, կամակցութեամբ և տրօք Ջուղայու ժողովրդոց և աւարտեցաւ ՌձԺԳ (1664) ամի: Որքան պատարագ և պաշտօնք որք ի սմայ կատարի՞ լիցի մասն և բաժին հարկ կենդանեաց և ննջեցելոց»⁹:

Իրանա-Հնդկաստանի հայոց թեմի աշխարհիկ կառավարիչները ընտրվում էին համայնքի ազդեցիկ հայ ընտանիքներից: Հոգևոր առաջնորդները ընտրությունից հետո հաստատվում էին միմիայն Ամենայն Հայոց կաթողիկոսների կոնդակով: 1646 թվականին, երբ մահանում է Իրանա-Հնդկաստանի ամենաարդյունավոր հոգևոր առաջնորդներից մեկը՝ Խաչատուր վրդ. Կեսարացին, որը նույնպես «Ի Մովսէս կաթողիկոսէն առաջնորդ կարգեալ էր Ջուղայեցոց ժողովրդեանն, որք

⁵ Առաքել վրդ. Դավրիժեցի, Պատմութ. Առաքել վրդ. Դավրիժեցոյ, Վաղ-պատ, 1896, էջ 202:

⁶ Խաչկեան Հովհաննէս, Գավազանագիր, Կալկաթա, 1876, էջ 2:

⁷ Այս մասին տես Հովհաննիսյան Աշ.—«Դրվագներ հայ ազատագրական մտքի պատմության», Եր., 1959. գիրք Բ, էջ 99:

⁸ Տէր-Յովհաննէս 3., «Պատմութիւն Նոր-Ջուղայու», հտ. Բ, էջ 96, Նոր-Ջուղա, 1881:

⁹ Տէր-Յովհաննէս 3., «Պատմութիւն Նոր-Ջուղայու», հտ. Բ, էջ 3, Նոր-Ջուղա, 1881:

յԱսպահան քաղաքին էին»¹⁰, թեմի ժողովրդի խնդրանքով առաջնորդական պաշտոնի է կոչվում Դավիթ վարդապետը (1652—1683)։ Ամենայն Հայոց Փիլիպպոս կաթողիկոսի (1633—1655) ձեռամբ բարձրանում է եպիսկոպոսության աստիճանի և 1652 թվականի ապրիլի 23-ի հայրապետական կոնդակով նշանակվում Իրանա-Հնդկաստանի թեմակալ առաջնորդ։ «Յիսուսի Քրիստոսի ծառայ Փիլիպպոսի կաթողիկոս Ամենայն Հայոց... Աստուածապահ քաղաքիդ Սպահանու ժողովրդեան մերում որ ի Ջուղա... եւ ընդ օրինութեանս ծանիք սիրելիք մեր ի տեր, զի ըստ Առաքելոյ բանին՝ հոգք ամենայն եկեղեցեաց ի մեզ ունիմք... Վասն որոյ և մեր տեսեալ յպակասութիւն եկեղեցեաց ձերոց որ այսքան ժամանակ է, որ յուսաւոր հոգի խաչատուր վարդապետն առ Ած է փոխեր, դուք առանց առաջնորդի էք, ձեռնադրեցաք զհոգևոր որդին մեր ՚Կաիթ վարդապետն, և առաքեցաք Ձեզ հովի և առաջնորդ, և տուաք նմա իշխանութիւն առաջնորդական որ հովուեսցէ զձեզ...»¹¹։

Իրանա-Հնդկաստանի հայոց թեմի հոգևոր իրավասության տակ էին Պարսկաստանի ութ գավառների 74 գյուղերում ապրող հայ գաղթականները։ Առաջնորդի հոգևոր իրավասությանն էր ենթակա նաև Նոր-Ջուղա, Շիրազ, Բուշեռ, Թեհրան, Համադան, Ռաշտ և Անվալի քաղաքների հայ բնակչությունը։ «Արդ վիճակաւոր քաղաքք Ամենափրկչեան վանի ի Պարսկաստան են Ջուղայ, Շիրազ, Բուշեռ, Թեհրան, Համադան, Ռաշտ և Անվալի։ Յաւաջին ժամանակս մինչ ի Քաշան՝ ի Ղազբին և ի Դարբանդ ևս կային բնակիչք Հայոց՝ էին ընդ իշխանութեամբ Ամենափրկչեան վանի։ Բաց ի քաղաքաց անտի ունի և Կոթ գաւառս յորս բնակին բազմաթիւ ժողովուրդք, որոց անուանք են Ղարաղան; Մալայիր, Քեակապ, Գեափըլայ, Քեամաբայ, Բուրվարի, Փէրիայ և Չարմահալ, որք ընդ ամենայն ունեն զեօթանաստն և չորս գիւղօրայս Հայոց»¹²։

Գաղթական հայությունը, օգտվելով հատկապես Շահ-Աբասի հանդուրժողական քաղաքականությունից, շատ կարճ ժամանակամիջոցում, բացի առաջնորդանիստ Ամենափրկչյան վանքից, շրջակա հայաբնակ գյուղերում և քաղաքներում կառուցում է 70—80 եկեղեցիներ ևս։ Այդ մասին է վկայում 1880

թվականին հրատարակված պարսկահայ համայնքների և եկեղեցիների ցանկը¹³։

Նույնը հաստատում է նաև Մեսրոպ Թադիսյանը իր «Պատմութիւն պարսկաց» աշխատության մեջ։ Շահ-Աբասը սկսբնական շրջանում բարյացակամ էր,—գրում է Թադիսյանը, «վկայ քեզ քաղցրութեան և շնորհաց արքայի՝ այն մեծամեծ ապարանք և երկնաբերձ եկեղեցիք մեր անդանօր և լցին վաշխարին պայծառութեամբ, առաւել ևս չքնադակերտ զՋուղա քան զԱսպահան կառուցեալ»¹⁴։ Ամեն բանից վեր դասելով հայրենիքից բերված ազգային ու կրոնական ավանդույթները՝ Իրանա-Հնդկաստանի թեմի հայ ժողովուրդը իր զգացմունքներն ու մտածումները անքակտելիորեն կապել էր սրբապան Արարատների փեշերին գտնվող իր բնօրրանին ու քրիստոսահաստատ սրբություն սրբոց Մայր Էջմիածինն։ Շահ-Աբասը զգալով, որ տրված այդքան արտոնություններից հետո էլ անհնար է գաղթական հայությանը մոռացնել տալ իր Հայրենին, ինչպես նաև «գերեզմանատունք հարց և նախնեաց նոցա և վանօրայք և ուխտատեղիք, որ դամբարանք են սրբոց, և մանաւանդ մեծահանդէս Աթոռն Ս. Էջմիածին, որ կայ սուրբ աջն Գրիգորի Լուսաորչին, որով օրինի սուրբ մեռունն. ուստի գնացեալ սփռէ յալգըս Հայոց յամենայն աշխարհ, որ և իցեն. վասն որոյ ամենայն ազգն Հայոց հնազանդին սրբոյ Աթոռոյն Էջմիածնի և կաթողիկոսի նորա, որ անդ նստի»¹⁵։

Արևելյան նշանավոր այս բռնակալը կամենում էր պանդխտություն տարված հայությանը վերջնականապես կապել պարսկական հողին։ Հայ ժողովրդի ավանդապահ ոգին, հայրենիքի և նրա դարավոր սրբությունների նկատմամբ անսխալում և անմնացորդ սերը շահ-Աբասին կատաղեցնում էին։ Տեսնելով այս ամենը՝ նրա մոտ հղանում է դժոխային մի միտք ևս. հիմքից քանդել Ամենայն Հայոց Մայր Էջմիածինը և նրա բոլոր քարերն ու հողը ուղտերով փոխադրել Պարսկաստան՝ Սպահանում մի նոր Էջմիածին կառուցելու համար։ Նա մտադիր էր այնտեղ փոխադրել նաև Ամենայն Հայոց Կաթողիկոսական Աթոռը։ Այս ձևով կստիպեր գաղթական հայությանը վերջնականապես կապվել Պարսկաստանին և մոռանալ Ս. Էջմիածինն ու հայրենական մյուս սրբությունները։ «Եւ յաւոր

¹⁰ Առաքել Դավրիժեցի, Պատմութիւն Առաքել վրդ. Դավրիժեցոյ, Վաղ-պատ, 1896, էջ 402։

¹¹ Տէր-Յովհաննէսեց Յ., Պատմութիւն Նոր Ջուղայու, հտ. Բ, էջ 30, Նոր-Ջուղա, 1881։

¹² Տէր-Յովհաննէսեց Յ., Պատմութիւն Նոր Ջուղայու, հտ. Բ, էջ 104, Նոր-Ջուղա, 1881։

¹³ Նույն տեղ, էջ 240—242։

¹⁴ Թադիսյան Մ., Պատմութիւն պարսից, Կակաթա, 1846, էջ 171—172։

¹⁵ Առաքել Դավրիժեցի, Պատմութիւն Առաքել վրդ. Դավրիժեցոյ, Վաղարշապատ, 1896, էջ 199։

միում գնաց շահն ի նշանակեալ տեղին, էր ընդ նաւն և խօջայ Նապարն՝ և այլք ոմանք ի Հայոց, ասաց շահն ընդ խօջայ Նապարին, վասն ձեր շինեմ աստ Էջմիածին, զի մի վասն այնմ Էջմիածնի կարօտութիւն կրեալ ճնկեցին սիրտք ձեր, և հրամայեմ գնալ բազում ուղտ, ջորի և սայլ, զի վքար և փող այնր Էջմիածնի քանդեալ բերցեն աստ, զի այնու քարով և հողով շինեցի այս Էջմիածինս, որպէսպի առանց իմիք երկբայութեան հաստատեցին սիրտք ձեր ի վերայ նոր շինեցելոյս»¹⁶:

Չարագործ Շահ-Աբասը շատ լավ էր հասկացել, որ անհնար է հայ ժողովրդին կտրել իր ամենամեծ սրբություններից՝ հայրենիքից, Ս. Էջմիածնից և Ս. Գրիգոր Լուսավորչի մատուքներից: «Քանպի ի վերայ Աշոյն և Էջմիածնի ամենայն ազգն Հայոց կապեալ կան»¹⁷: Հենց այս ճշմարտությունը գիտակցելով՝ նա ցանկանում էր ամեն գնով իրագործել իր դիվային ծրագիրը: Եթե շահը չիրագործեց մեր ժողովրդի մեծագույն սրբությունը քանդելու սուկալի ծրագիրը, այդ ոչ թե նրա համար էր, որ այն անիրագործելի էր, այլ, երջանիկ պատահականությամբ, նա ընդառաջելով Նոր-Ջուղայի ավանդապահ ու հայրենասեր հայությանը և հատկապես խոջա Նապարի թախանձանքին, բավարարվեց միայն Ս. Էջմիածնի Մայր տաճարի վանական մասերից 15 քարեր քանդելով և դրանք Ս. Լուսավորչի Աջի հետ միասին տեղափոխել տալով Նոր-Ջուղա: Այսպես, կարծեք թե հրաշքով փրկվեց հայոց մեծագույն ու նվիրական սրբավայրը՝ Ս. Էջմիածինը: Իր պանդուխտ ժողովրդի դժբախտ ձակատագրին արժանացած Մայր տաճարի մամռոտած, մեռնաբոյր քարերը, որպես նշխար ու սրբություն, առ այսօր էլ պահվում են Նոր Ջուղայի մոտ գտնվող Ս. Գևորգ եկեղեցում, որը կառուցվել է 1611 թվականին¹⁸:

Դժբախտաբար, Իրանա-Հնդկաստանի հայոց նյութական, հոգևոր և մշակութային կյանքի ծաղկումը տևում է մինչև ԺԷ դարի վերջը: 1694 թվականից հետո, երբ պարսկական զանգուրն է բազմում կրոնամու, թուլամորթ և մահմեդական հոգևորականության ձեռքին խաղալիք դարձած Հուսեյին շահը, Նոր-Ջուղայի և առհասարակ Իրանա-Հնդկաստանի թեմում ապրող հայ ժողովրդի կյանքը թունավորվում, անտանելի է դառնում: Պարսիկ մոլեռանդ հոգևորականությունը,

օգտվելով Հուսեյին շահի (1694—1722) կրոնամոլությունից, պետության դեկը իր ձեռքըն է վերցնում և սկսում հայ ժողովրդի կեղեքման ու բռնի մահմեդականացման գործը: Հարկ է նշել, որ հայ ժողովրդին ազգովին մահմեդականացնելու փորձերը սկսվել էին դեռևս Շահ-Աբասի օրերից: Իր բնաշխարհից արտաքսված գաղթական հայության ներքին ստեղծագործական ուժերը լավագույն ձևով օգտագործելով Պարսկաստանի տնտեսության վերականգնման համար, միևնույն ժամանակ Շահ-Աբասը (1587—1628), որպես ուղղափառ մուսուլման, մշտապես հետապնդում էր իրանահայությանը մահմեդականացնելու նպատակը: Առաքել վրդ. Դավրիժեցին իր պատմության մեջ նկարագրում է բռնի մահմեդականացման մի քանի դեպքեր: Շահ-Աբասը, —պատմում է Դավրիժեցին,—սովորություն ուներ ծայտված մտնել գաղթական հայության մեջ նրանց տրամադրությունները հասկանալու համար:

«Եւ զի սովորութիւն էր այս Շահ-Աբասիս երբեմն-երբեմն, զի այլակերպեալ զինքն՝ ձևանայր իբրև զմի ի Կորականաց՝ և գնար ի տեղին ուր գնարց էր»¹⁹: Ծայտված, հասարակ մի կորականի զգեստներ հագած շահը, հանդիպելով գաղթական մի հայ կնոջ, խնդրում է տասը դրամով, ի սեր շահի, վաճառել իրեն մի հավ: Պանդուխտ հայ կինը, վայրացած, անիծում է Պարսկաստանի միապետին՝ ասելով. «Երանի թե ոչ էր բերեալ զմեզ՝ զի վտարանդի արարեալ եհան զմեզ ի նախնի աշխարհէն մերմէ, ի բնիկ տեղեաց, և ի հայրենի ժառանգութեանց, և բերեալ աստէն յօսար աշխարհի բնակեցոյց պանդխտութեամբ»²⁰:

Գեղջուկ հայ կնոջ անկեղծ այս խոստովանությունը կատաղած Շահ-Աբասը ընդունեց իբրև «վերկսայրի սուր»: «Եւ այնուհետև բարձաւ գութ և ողորմ ի սրտէ թագաւորին ընդդէմ Հայոց, և կոչեաց առաջի իւր զվեպիրն, ընդ նմին և զշեխն, որում անունն էր Միր-Աւդուպայ, և հրամայեաց նոցա Կորականի մտանել ի գաւառն յայնսիկ, և ծագէ ի ծագ տաճկացոցանէլ և թղպատել»²¹: Շահի արձակած այս հրամանը նոր երանդ տվեց մահմեդական կրոնի սպասավորներին, որոնք վաղուց էին սպասում նման վիճակի ստեղծվելուն: Գաղթական հայությունը փախչում էր դժոխք Փերայի գավառից, որպէսպի մի կերպ ապստամբ բռնի մահմեդականացումից:

¹⁶ Սույն տեղ, էջ 200:

¹⁷ Առաքել Դավրիժեցի, Պատմութիւն Առաքել վրդ. Դավրիժեցոյ, Վաղարշապատ, 1896, էջ 200:

¹⁸ Տես Վահան քահանա Աղանեան, Նոր Ջուղայի եկեղեցի ուխտատեղիները, Նոր-Ջուղա, 1927, էջ 16:

¹⁹ Առաքել Դավրիժեցի, Պատմութիւն Առաքել վրդ. Դավրիժեցոյ, Վաղարշապատ, 1896, էջ 163:

²⁰ Սույն տեղ, էջ 164:

²¹ Սույն տեղ, էջ 165:

Բռնությամբ թլփատված հայ քահանաներին, որպես կաշառք, շահի կողմից տրվում էր 40 ոչխար: Խորամանկ այս կարգադրությամբ շահը ցանկանում էր կաշառել հայ քահանաներին, որոնք, ըստ նրան, իրենց ետեվից կսանեին հայ ժողովրդին՝ հեշտացնելով սփռված նրա մահմեդականացման գործը: Ո՛չ օրենքի ուժը, ո՛չ բռնությունը, ո՛չ նահատակությունը և ո՛չ էլ շահական կաշառքը հաջողություն չբերեցին Պարսկաստանի տերերին: Ըստ Աբասը համոզվեց, որ անհնար է բռնի մահմեդականացնել մի ժողովրդի, որն այնքան ամուր թեղերով կապված է իր Եկեղեցուն: Պարսկաստանի տիրակալը, տեսնելով բռնի մահմեդականացման դատապարտված հայության համառությունը և նվիրվածությունը իր անցյալին և սրբություններին, տեղի է տալիս և թույլատրում, որ բռնի թլփատված հայերը վերստին դառնան իրենց քրիստոնեական հավատքին:

Դժբախտաբար, մահմեդական կրոնի սպասավորները չէին կարող հաջողվել այն մտքի հետ, որ իրենց կողքին պիտի ապրեր ոչ մահմեդական մի ժողովուրդ ևս: Հետագայում նրանց հաջողվեց շահի միջոցով հրապարակել մի դաժան օրենք: Ըստ այդ օրենքի, եթե հայ ընտանիքի անդամներից մեկը ընդուներ մահմեդականություն, կդառնար ողջ գերդաստանի միակ ժառանգորդը և կտիրանար իր գերդաստանի ամբողջ ունեցվածքին: «Նաև սահմանեաց օրէն մի խստագոյն թէ՛ ով ոք ի յազգէ հայոց դարձցի ի հաւատոց իւրոց, և մտցէ ի մոլար և անաստուած կրօնս պարսից, ունիլ կարասցէ նա ապատութիւն ըստ հրամանի դատարորին, և ժառանգեսցէ պիամայն ժառանգութիւնս տան հայրենեաց իւրոց, պրկելով պայ ժառանգակիցք ի՛ր՝ որք ի յօրէնս իցեն աստուածպաշտութեան»²²:

Ընտանիքի հիմքերը խարխուղ դաժան այս օրենքն էլ ի պորու չեղավ կոտրելու հայ ժողովրդի համառությունը քրիստոնեությունից հրաժարվելու գործում:

ԺԸ դարում, ինչպես նշվեց, պարսից գահակալները խաղալիք էին դարձել մահմեդական հոգևորականության և խաների ձեռքին: Օգտվելով երկրի անիշխանական վիճակից՝ ընչաքաղց խաները և պետական պաշտոնյաները, որոնց աչքն էր ծակում Նոր-Ջուղայի հայեոյի անհատնում հարստությունը, պենքի ուժով, սարսափեցնելով, կողոպտում էին իրանահայությանը: Անտանեյի այս վիճակին ավելացավ նաև 1722 թ. ավղանների արշավանքը դեպի Պարսկաստան, որը ոչ միայն հիմնահատուկ քանդեց Նոր-Ջուղա առաջ-

նորդոնիստ քաղաքը, այլև մեծ վնաս հասցրեց ողջ թեմի հոգևոր ու մշակութային կյանքի առաջընթացին: Պարսկաստանի ներքին քաղաքական ու տնտեսական անկայուն վիճակը, ինչպես նաև քրիստոնյաների ֆիզիկական անապահով կացությունը ստիպեցին, որ Իրանա-Հնդկաստանի թեմի հայությունը պանգվածորեն գաղթականության ելնի: Երկրորդ անգամ գաղթականության ելած հայությունը հիմնականում հաստատվեց Հնդկաստանում և Հեռավոր Արևելքի երկրներում: 1851 թվականին Իրանա-Հնդկաստանի թեմի կողմից կազմված մարդահամարից երևում է, որ այդ շրջանում միայն Նոր-Ջուղայում, որը նախապես ուներ 12 հազար տուն, գաղթականությունից հետո մնացել էր ընդամենը 371 տուն²³:

ԺԷ դարի Իրանա-Հնդկաստանի հայոց կրոնական, տնտեսական ու մշակութային անօրինակ փայլը մեծապես հրապուրեց նաև հռոմեական Եկեղեցուն, նոր թափով ուժեղացրեց քարոզչական գործը այլադավան քրիստոնյաների: Այդ նպատակով ԺԶ—ԺԷ դարերում Հռոմի պապական Աթոռի կողմից հիմնադրվեցին մի շարք միաբանություններ՝ Դոմինիկյաններ, Հիսուսյաններ, Օգոստինյանք, Կարմեյանք և Կապուչինյանք²⁴, որոնց հիմնական նստակայան էր ոչ կաթոլիկ ժողովուրդներին վերստին «քրիստոնյա» մկրտել:

ԺԷ դարում, Արևելքում գործող հռոմեական Եկեղեցու հավատքի տարածման առաջատար այս միաբանությունները իրենց խոստումներով փորձում էին հավատացնել խավարի ու հուսահատության մեջ գտնվող հայ ժողովրդին, որ միայն կաթոլիկությունը պիտի լուսավորի և փրկի նրան: Հարկ է նշել, որ Նոր-Ջուղա և Սպահան հաստատված կաթոլիկ քարոզիչներից ամենավաղավորները Հիսուսյաններն էին, որոնք իրենց գործունեության ճանապարհին միջոցների մեջ ոչ մի խտրություն չէին դնում: Իգնատիոս Լոյոլայի հոգևոր որդիները, շնորհիվ իրենց կոռ կազմակերպության, Նոր-Ջուղայում սկսեցին շրջանում որոշակի հաջողության հասնել: Նրանց հաջողվեց կառավարական հատուկ արտոնագրով Նոր-Ջուղայում և Սպահանում ունենալ իրենց վանքն ու դպրոցը: Գործի դնելով իրենց բոլոր հնարքները՝ նրանք կարողացան նույնիսկ իրենց ենթարկել հայկական մի քանի աղղեցիկ տներ: Նոր-Ջուղայի աչքի ընկնող գերդաստաններից մեկը՝ Ըսհ-

²³ Այս մասին տես «Բազմավես», Վենետիկ, 1904, էջ 235:

²⁴ Այս մասին տես Կոստանյան Կ., «Հայագիտությունը Արևմտյան Եվրոպայում» աշխատությունը, Թիֆլիս, 1910:

²² Խաչատուր վրդ. Ջուղայեցի, Պատմութիւն Պարսից, Էջմիածին, 1905, էջ 111—112:

բիմանյանները, ոչ միայն համակրեցին, այլև ընդունելով կաթոլիկություն, իրենց դիրքով ու նյութական միջոցներով սատար հանդիսացան կաթոլիկ քարոզիչների լայն գործունեությանը: ԺԷ դարում հռոմեական Եկեղեցին առաջնային կարևորություն էր տալիս Իրանա-Հնդկաստանի հայոց կաթոլիկացմանը:

Թեմի ժրաջան հոգևոր առաջնորդներից շատերը կարողացան վստահորեն և արդյունավետ կերպով պայքարել եվրոպական կղերություն ստացած կաթոլիկ քարոզիչների դեմ: Այդ պայքարում Իրանա-Հնդկաստանի ուխտապահ հայ եկեղեցականությունը ոչ միայն փրկեց մեր եկեղեցու դավանանքը, այլև զաղափարական իր պայքարով ցրեց ողջ պարսկահայության գլխին կուտակված ձուլման ահավոր վտանգը:

Կաթոլիկ քարոզիչների գործունեության դեմ Իրանա-Հնդկաստանի հայոց թեմում առաջին պայքարը կազմակերպել և գլխավորել է Խաչատուր վրդ. Կեսարացին (1620—1646), որը Մայր Աթոռից իր հետ տանելով Սյունյաց դպրոցի շունչն ու հոգին՝ իր առաջնորդության տարիներին Ամենափրկչյան վանքում իր շուրջը հավաքեց մի քանի կարող եկեղեցականներ, հիմնեց դպրոց, ստեղծեց տպարան, որը ողջ Արևելքում փաստորեն առաջինն էր: Ինքնաստեղծ այդ տպարանի մամլիչների տակից դուրս եկած դավանաբանական ու հայրենասիրական մատյանները պատնեջելու եկան ողջ պարսկահայությանը՝ ընդդեմ կրոնափոխության: Խաչատուր վրդ. Կեսարացու դպրոցը եղավ այն դարբնոցը, որտեղից դուրս եկած շրջանավարտները իրենց ուներին տարան ոչ միայն թեմի լուսավորության գործը, այլև մեծ հաջողությամբ պայքար կազմակերպեցին կաթոլիկ քարոզչության դեմ: Կաթոլիկները, ոգևորված լեհահայության մեջ ունեցած իրենց հաջողություններից, այս անգամ իրանահայության մոտ էին եկել հավատափոխության մեծ ճակատամարտ տալու ընդդեմ Հայաստանյայց Եկեղեցու:

1688 թվականին Հիսուսյան քարոզիչները, հաստատվելով Նոր-Ջուղայում, Սպահանում, կառուցեցին իրենց եկեղեցին ու դպրոցը և նոր թափով վերսկսեցին իրենց պառակտիչ գործունեությունը: Այդ օրերի հայոց թեմակալ առաջնորդ, քաջակորով Ս. Ստեփանոս Եպիսկոպոսը (1684—1695) շատ լավ էր հիշում երբեմնի: Ժողովուն ու շենշող լեհահայ զաղութը, որն այնքան անարդար կերպով փոքր դարձավ կաթոլիկ Եկեղեցու հանցավոր հարձակման: Հիսուսյանները իրենց դպրոցների և եկեղեցիների դռները լայն բանալով հայության առջև՝ փորձում էին հայ մատաղ

սերնդի կրթության և դաստիարակության գործն ամբողջությամբ իրենց ձեռքը վերցնել, հավատալով, որ այդ պիտի արագացներ ու հեշտացներ հայ ժողովրդի կաթոլիկացման գործը: Կանգնած լինելով ճակատագրական վտանգի դեմ հանդիման՝ Ս. Ստեփանոս Եպիսկոպոսը միջոցներ և ուղիներ էր փնտրում իր հոտին հեռու պահելու կաթոլիկ քարոզիչների մոլորություններից: Ի տես հայության ծոցում ստեղծված ալեկոծ այս վիճակի 1689 թվականին հայոց համայնքին օգնության է գալիս նաև Սուլեյման շահի հրամանը Հիսուսյանների քարոզչության դեմ, որով երկրից վտարվում են Հիսուսյան քարոզիչները, որովհետև «օտարք ի սահմանաց Երրպիոյ եկեալ ի Պարս խռովեն վխաղաղութի:ն ժողովրդեանն Հայոց»²⁵:

ԺԸ դարի սկզբներին պապականության վտանգը նորից է կախվում Իրանա-Հնդկաստանի հայոց գլխին: Տեսնելով կաթոլիկ կղերի ձեռքից քաջած այն տառապանքները, որի մեջ գտնվում էր Իրանա-Հնդկաստանի թեմի հայ ժողովուրդը, Աղեքսանդր Ա Ջուղայեցի կաթողիկոսը (1706—1714) հատուկ կոնդակով դիմում է Կղեմես ԺԱ Պապին սաստելու պարսկահայության մեջ խռովություն սերմանող կաթոլիկ քարոզիչներին, որովհետև «յուզեն նոքա պժողովուրդն և յարուցանեն պաղմուկ խռովութեան, որով անունն քրիստոնէութեան հայիոյ ի մէջ հեթանոսաց, և ի դարման նոցին խնդրեաց արձակել զգիր հրամանի առ նոյն քարոզիչսն սակս դադարելոյ նոցա ի խռովայուլութեանց անտի»²⁶: Ինչպես երևում է, Հայոց Հայրապետի այս բողոք-կոնդակն էլ չսովեց սպասված արդյունքը, որովհետև դրանից հետո կաթոլիկ քարոզիչները էլ ավելի ուժեղացրին քաջայիջ իրենց քարոզչությունը: Օրիսական այդ վիճակից դուրս գալու միակ ելքը մնում էր բողոքել երկրի միապետին: 1723 թվականին թեմի ողջ հայության անունից Իրանա-Հնդկաստանի թեմակալ առաջնորդ Մովսես Եպիսկոպոսը (1706—1725) բողոքագրով դիմեց Շահ Սուլթան Հոսեյնին, որից հետո միայն Հիսուսյանները դադարեցին հայ երեխաներին վերցնել իրենց դպրոցներում ուսանելու: Չգալով իրենց համար գործելու արդեն աննպաստ պայմանները՝ Հիսուսյանները ժամանակավորապես կարծեք թե հանգիստ թողին իրանահայությանը: Սակայն 1841 թվականին Հռոմեական Եկեղեցու քարոզիչները նոր թափով ու կատաղությամբ

²⁵ Տեր-Յովհաննես, Պատմութիւն Նոր-Ջուղայու, հատ. Բ, էջ 265, Նոր Ջուղա, 1881:

²⁶ Տեր-Յովհաննես 3., Պատմութիւն Նոր-Ջուղայու, հատ. Բ., էջ 268, Նոր-Ջուղա, 1881:

սկսում են իրենց քայքայիչ գործունեությունը՝ իրենց կողմը գրավելով մի քանի կուսակրոն ու ամուսնացյալ եկեղեցականներ: Նախադեպը չունեցող այս դեպքը արեկոծում է պարսկահայ ողջ գաղթօջախը, բայց շնորհիվ թեմակալ առաջնորդ Խաչատուր Եպիսկոպոսի (1838—1842) եռանդուն գործունեության, հնարավոր է դառնում վերականգնել թեմի խաղաղությունը: ԺԹ դարի կեսերից հետո կաթոլիկ Եկեղեցին, պայտվ իր անպորտությունը, թուլացրեց իր քարոզչական գործունեությունը Իրանա-Հնդկաստանի թեմում, որն այլևս վտանգ չէր ներկայացնում: Իրանա-Հնդկաստանի թեմի հիմնադրման օրից Արեւելքում գործող կաթոլիկ Եկեղեցու վեց-յոթ միաբանություններ իրենց տխրահոջակ գործունեությամբ անչափելի վիշտ ու տառապանք բերին հայ ժողովրդի պատվական այդ հատվածին, բայց, փառք Աստուծո, նրանց այդպես էլ չհաջողվեց Իրանա-Հնդկաստանի հայոց թեմը երկրորդ Լեհաստան դարձնել:

Ֆրանսիացի մեծ ճանապարհորդ Շարդենը, խոսելով կաթոլիկ Եկեղեցու կողմից գործադրված միջոցների մասին հատկապես Իրանա-Հնդկաստանի հայոց նկատմամբ, գրում է. «...Հայերը միշտ պահպանել են իրենց հին ժամասացությունը, և այս հանգամանքը կարելի է համարել ողղակի ապշեցուցիչ, եթե չասենք գերբնական, որովհետև նրանք տասը և մեկ դար գտնվում են մահմեդականների տիրապետության տակ...: Սակայն, չնայած այս պայմաններին, նրանց հավատը, ինչպես արդեն ասել եմ, մնացել է անասան,

և նրանք պահում են այդ հավատը, չկամենալով փոխել մի ուրիշի հետ, անխախտ տանելով մահմեդականների, իրենց տերերի անսահման ճնշումները, ինչպես նաև հռոմեական առաքելությունների բոլոր փորձերը, որոնք երկու դարի ընթացքում անպտուղ ձգտում են իրենց միսիոներների, քահանաների և վարդապետների օգնությամբ գրավել նրանց դեպի իրենց դավանությունը: Ես խոսքեր չունեմ նկարագրելու այն խորամանկություններն ու ծախսերը, որոնց այդ նպատակով դիմում էր Հռոմի Աթոռը, սակայն ոչ մի բան ցանկացած հետևանքներին չհասցրեց...»²⁷:

Շնորհիվ Մայր Աթոռի գործնական օգնության և թեմակալ առաջնորդների անձանձրույթ ու նվիրված գործունեության, Իրանա-Հնդկաստանի հայոց թեմը կաթոլիկ Եկեղեցու համար եղավ ու մնաց չգրավված այն բարձունքը, որին հասնելու համար հռոմեական Եկեղեցին քիչ ջանքեր չթափեց՝ այդ կողմերն ուղարկելով իր քարոզիչների ամենամուղեանդներին, որոնք, հակառակ իրենց բոլոր ջանքերին, չկարողացան հայրենական ավանդություններով ապրող ու շքնչող այդ թեմը պոկել ու օտարացնել իր մորից՝ Ս. Էջմիածնից:

ԵՂԻՇԵ ԱՎԱԳ ՔԱՀԱՆԱ ՍԱՐԳՍՅԱՆ

²⁷ Լեո, Երկերի ժողովածու, հատ. երրորդ, էջ 428—429, Երևան, 1969:

(Շարունակելի)